

**UCAPAN PERDANA MENTERI KETIKA MENGEMUKAKAN USUL UCAPAN TAKZIAH KEPADA KELUARGA MENDIANG TAN SRI V. MANICKAVASAGAM, DI DEWAN RAKYAT PADA 15 OKTOBER, 1979.**

Tuan Yang Dipertua,

Saya mohon izin mengemukakan suatu usul yang berbunyi:

“Bahawa Dewan ini merakamkan perasaan dukacita yang amat sangat di atas kematian Yang Berhormat Tan Sri V. Manickavasagam, Menteri Pengangkutan pada hari Jumaat, 12 Oktober, 1979 dan menyampaikan ucapan takziah kepada keluarganya.”

Tuan Yang Dipertua,

Dewan ini sekali lagi kehilangan seorang ahlinya dan negara, seorang negarawannya. Banyak kata-kata kenangan dan penghormatan telah dilafazkan oleh pemimpin-pemimpin, sahabat-sahabat handainya dan orang ramai, terhadap jasa cemerlang, dedikasi dan kejujuran mendiang Tan Sri Manickavasagam kepada kaum dan negaranya. Kematianannya yang mengejut itu sungguh menyedihkan kita semua.

Mendiang Tan Sri Manickavasagam adalah seorang veteran politik dan ahli yang paling lama berkhidmat dalam Jemaah Menteri Persekutuan. Bermula sebagai ahli Lembaga Bandaran Kelang pada tahun 1949, ia menjadi ahli Dewan yang mulia ini pada tahun 1959 dan dilantik sebagai Menteri Muda Buruh, dan pada tahun 1964 sebagai Menteri Buruh. Pada tahun 1974 ia dilantik menjadi Menteri Perhubungan, Telekom dan Pos, yang sekarang ini dikenali sebagai Kementerian Pengangkutan, sehinggalah akhir hayatnya. Jasanya di Kementerian-kementerian tersebut adalah banyak dan tidaklah payah saya menyebutnya satu persatu. Begitulah juga jasanya kepada badan-badan antarabangsa seperti Bangsa-Bangsa Bersatu dan Pertubuhan Buruh Antarabangsa.

Tuan Yang Dipertua,

Tidaklah kurang cemerlang ialah sifat-sifat peribadinya. Ia adalah seorang yang halus budibahasanya, hemah dan bertimbangrasa. Kesabaran adalah satu sifatnya yang ternyata, sebagaimana yang dapat disaksikan oleh ahli-ahli Dewan ini sendiri. Sebagaimana hangat dan hebat ‘criticism’ ditujukan ke atasnya dalam dewan ini, ia senantiasa tenang

dan dengan berhalus memberi jawapan, penerangan dan penjelasan. Ia adalah seorang yang sedar sangat akan tanggungjawabnya kepada Dewan ini, kepada rakyat dan negara. Dalam jawatannya sebagai menteri, ia telah menghadapi berbagai-bagai masalah yang berat dan rumit. Tiap-tiap kali masalah-masalah seumpama itu berbangkit, ia menumpukan segala tenaga dan fikirannya kepada masalah-masalah itu dengan tidak menghiraukan waktu dan kesihatannya.

Pendek kata, Tuan Yang Dipertua, kehilangan Tan Sri Manickavasagam adalah suatu kerugian yang besar kepada Dewan ini dan negara. Bagi diri saya, saya kehilangan seorang sahabat yang rapat, yang dihormati, yang boleh saya bersandar untuk mendapat nasihat dan sokongan yang jujur dan ikhlas.

Tuan Yang Dipertua, saya mohon mencadang.